



Inatsisartunut ilaasortaq Emanuel Nûko, Naleraq
Inatsisartut Allattoqarfiat
/Maani

**Illoqarfinnut, nunaqarfinnut isorliunerusunullu KNI-p akinik
inissiisarneranut tunngasunik § 37 naapertorlugu apeqqtinut nr.
2021/170-meersunut akissutit**

01-02-2022
Postboks 1015
3900 Nuuk
Oqarasuaat (+299) 34 50 00
Fax (+299) 32 50 02
E-mail: govsec@nanoq.gl
www.naalakkersuisut.gl

Asasara Emanuel Nûko,

Ingerlatseqatigiiffinnut Namminersorlutik Oqartussanit pigineqartut ilaannut ataatsimut ingerlatsinermut suliaasaqarfinnut tunngasunik Inatsisartut suleriaasianni § 37 naapertorlugu Naalakkersuisunut apeqquteqarputit. Apeqqtigisatit uannit akineqartussanngorlugit innersuunneqarput.

Akit inissinnissaat pillugit sammisanut, KNI-p akisussaannermik aalajangiisarnermillu piginnaatitaaffigisaata iluaniittunut apeqqtit innersuussimmata ingerlatseqatigiiffiup pisortaqarfianit akissutissat pissarsiarineqarsimapput.

Apeqqtigineqartut ima oqaasertaqarput:

- 1. Nunaqarfinni nioqqutissat Pilersuisup akitsorternikuuai aasap ukiallu ingerlanerani taava Naalakkersuisut ilisimatitsissutaat pisisartunut nammakkiutaassaanngitsoq qanoq paasissavarput?**

Matumani § 37 naapertorlugu apeqqtigineqartut akinissaannut atugassanik KNI A/S-imit akissutissanik pissarsiniartoqarsimavoq, imatullu akissuteqarpoq:

“2021-mi septembarip naanerani nioqqutigisanut assartuinermit naatsorsuutit Pilersuisup tamatigoortumik qaffappai. Tamanna Royal Arctic Linemit uuliamut aningaasallu nalinginut tapiliutit, 1/3 2021-1/10 2021-mi -3 %-init 6,3 %-inut qaffassimasut aallaavigalugit iliuuseraarput. Assartuinermit tamarmiusumit uuliamut aningaasallu nalinginut tapiliutit annikitsuinnaapput, assartugarisalli annertussusaasigut taamatut qaffaaneq malunnaateqanngitsuunngilaq.

Tamatuma saniatigut Pilersuisumut pilersuisut akiini allannguisoqartillugu akit tamatigut naleqqussarneqartuassapput. Tamanna nioqqutissiassat akiini pilersuisulluunniit assartuinnermut akigititaanni allannguisoqarneranik patsiseqarsinnaavoq, tamannalu ukiumi kingullermi tamatigoortumik taamatut pisimavoq.

Pilersuisoq ukiumut arlaleriarluni akinik misissueqqissaartarpoq, matumani akit Brugsenimi Pisiffimmilu akinut sanilliunneqartarlutik. Atugassanik pisiniarfut uiguleriiaat sinnerisa iliuuserisartagaannut naleqqiullugit nioqqutigisanut annertunerusumik akeqartitsinninnissarput qularnaarniarlugu taamatut iliuuseqarpugut.

Naggasiutigalugu ukiut tamaasa akigititavut Inuussutissarsiornermut Suliffeqarnermullu Naalakkersuisoqarfimmu nalunaarutigisarpavut, taamatut nalunaarutaasumut kingullermut 2020-mi januaarimeersumut naleqqiullugu akit 2,57 %-inik appariarsimanerat takutippaa.

Ingerlatseqatigiiffiup naatsorsuutaasa ilisimaneqartutut pissusissamisuunnginnerisa kingunerisaannik akinik nalimmassaasoqanngilaq.”

2. Sooq piginnittut Naalakkersuisut kissaataat uniorlugit ingerlasoqarpa?

Naalakkersuisut paasinninnerat naapertorlugu KNI-p suliaqarnera inatsisit atuuttut kiisalu kiffartuussinissamik isumaqatigiissutigineqarsimasut naaperorlugit aaqqissuunneqartarpoq. Ingerlatseqatigiiffiit ataasiakkaat tamarmik ileqqoreqqusaanni, inatsisitigut tunngavigisaanni imaluunniit isumaqatigiissutaanni allasimasut suliasanik tamakkuninnga Namminersorlutik Oqartussat pigisaattut aktiaateqarluni ingerlatseqatigiiffiusut taakku suliaqartuarnissaat Naalakkersuisut isumaqarfigaat.

Aktiaateqarluni ingerlatseqatigiiffiit Namminersorlutik Oqartussanit pigineqartut allat assigalugit KNI A/S suliainik peqqissaartumik, aningaasaqarnikkullu naammaginartumik isumaginillunilu suliffigiuminassasoq, minnerunngitsumillu inuiaqatigiit ineriartornerannut innuttaasunillu kiffartuussinermut ilalersueqataasut misigineqassasoq Naalakkersuisut isumaqarfigaat.

Apeqqummut saqqummiunneqartumut allanik ilassutissaqanngilanga.

Inussiarnersumik inuullaqqusillunga,



Múte Bourup Egede